



## MOCIÓN DO PARTIDO SOCIALISTA DE CARBALLO PARA A ADAPTACIÓN DE PASOS DE PEÓNS PARA PERSOAS CON TRASTORNO DO ESPECTRO AUTISTA

O Grupo Municipal do Partido dos Socialistas de Galicia PSdeG - PSOE, en base ó disposto nos artigos 91.4 e 97.3 do Regulamento de Organización, Funcionamento e Réxime Xurídico das Entidades Locais e demais normativa de aplicación, presenta a seguinte MOCIÓN para o seu debate no Pleno.

### EXPOSICIÓN DE MOTIVOS.

**Primeiro.-** Os Trastornos do Espectro Autista (TEA), defínense como unha disfunción neurolóxica crónica con forte base xenética que, dende idades temperás, maniféstase nunha serie de síntomas relacionados coa interacción social, a comunicación e a falta de flexibilidade no razoamento e os comportamentos. A pesar das clasificacións, ningunha persoa que presenta un TEA é igual a outra en canto ás características observables.

En tódolos casos, preséntanse manifestacións clínicas en varios aspectos nas seguintes áreas: interacción social, comunicación e repertorio restrinxido de intereses e comportamentos. As manifestacións do trastorno adoitan poñerse de manifesto nos primeiros anos de vida e variarán en función do desenvolvemento e a idade cronolóxica dos nenos.

Acéptase que *«o autismo é o trastorno máis xenético das síndromes neuropsiquiátricas»*

**Segundo.-** A accesibilidade universal axuda a que tódalas persoas comprendan, utilicen, participen e gocen das contornas con autonomía e comodidade.

Existen tres tipos dentro da accesibilidade universal:

- **Accesibilidade física.** As contornas que son accesibles de forma física permiten que as persoas con diferentes necesidades de mobilidade poidan utilizalas.
- **Accesibilidade sensorial.** As que son accesibles de forma sensorial permiten que as persoas con diferentes necesidades de visión ou audición poidan utilizalas.
- **Accesibilidade cognitiva.** As de forma cognitiva permiten que as persoas con diferentes necesidades de comprensión poidan utilizalas. A accesibilidade cognitiva contempla as características e capacidades das persoas con TEA e axúdalles a comprender, utilizar, participar e gozar das mesmas con autonomía e comodidade.

A accesibilidade cognitiva permite orientarse con facilidade polas contornas, entender a información destas, comunicarse e relacionarse con outras persoas. En definitiva, axuda a tódalas persoas.

A accesibilidade cognitiva beneficia de forma especial ás persoas con dificultade para comprendelas contornas, como ás persoas con TEA.



Outras persoas con dificultades de comprensión poden ser:

- **As de discapacidade intelectual.**
- **As maiores.**
- **As que non saben ler e escribir.**
- **As que non dominan os idiomas, por ser doutros países.**

Unha contorna é accesible de forma cognitiva cando todas as persoas poden comprendelo e utilízalo de forma sinxela.

**Terceiro.-** Os sistemas de sinalización serven para que tódalas persoas saiban que facer en cada contorna, e estes teñen que ser claros e sinxelos. Os sinais deben cumprir varias funcións, algunhas delas:

- Favorecer o desprazamento seguro e autónomo
- Apoiar a localización no espazo e o tempo,
- Facilitar a realización das accións previstas en cada contorna.

Nunha contorna con sistemas de sinalización para todas as persoas, as de TEA poden:

- Comprender a información das imaxes, pictogramas, avisos e anuncios,
- Seguir direccións ou indicacións,
- Desprazarse con autonomía e seguridade,
- Saber que se espera en cada lugar.

**Cuarto.-** Para que estes sinais sexan máis claros, dende hai uns anos en diferentes cidades españolas, apostouse por unha adaptación dos pasos de peóns. Para que esta adaptación sexa rigorosa, creouse a asociación sen ánimo de lucro TEAVIAL, formada por especialistas dos diferentes ámbitos da educación, terapeutas e axentes viarios.

Esta asociación conta co «*Proxecto TEAVIAL: unha contorna de accesibilidade cognitiva*». Traballan cos concellos na súa implantación, controlando que a adaptación sexa a idónea, asegurándose de que todas as sinais sexan as mesmas en tódalas cidades interesadas (para evitar confusións) e, tamén, ocúpase da elaboración dunha guía didáctica que explique a súa funcionalidade.

Para a realización deste proxecto, TEAVIAL pide a firma dun convenio de colaboración, sen custo algún, co concello interesado, no que:

- Se recoñeza a TEAVIAL como autores da secuencia dos pictogramas.
- Se permita a algúns membros de TEAVIAL estar presentes o día da pintada da secuencia para fotografar o momento co fin de difundir e estendelo proxecto.
- O Concello aboe os gastos de pintar os pictogramas (ao redor de 252€, IVE incluído).
- O Concello se comprometa á pintada e ó mantemento dos pictogramas.

**Quinto.-** O Grupo Municipal Socialista considera que a Administración Local debe promover a inclusión e participación social de tódolos veciños e tódalas veciñas. Por iso, é de gran

interese adoptar, promover e desenvolver as medidas necesarias para favorecela inclusión das persoas con Trastorno do Espectro Autista, de todas aquelas con diversidade funcional, así como das persoas maiores e nenos e nenas que puidesen prestar menos atención á hora de cruzalas rúas.


Deste xeito, avanzaremos cara á consecución dunha sociedade que respecte a diversidade, e dea resposta ás necesidades dos diferentes colectivos, favorecendo o exercicio pleno dos dereitos da cidadanía, e garantindo a súa calidade de vida en igualdade de oportunidades.

O desenvolvemento desta moción vincúlase coa consecución do ODS 11, «*Cidades e comunidades sostibles*», no que o obxectivo é «*lograr que as cidades sexan máis inclusivas, seguras, resilientes e sostibles*».

**Por todo o antes exposto, o Grupo Municipal Socialista presenta para a súa aprobación polo Pleno, a adopción do seguinte acordo:**

**Primeiro.-** O Concello de Carballo acorda iniciais trámites oportunos para favorecela accesibilidade cognitiva coa adaptación dos pasos de peóns para as persoas con TEA.

**Segundo.-** O Concello de Carballo acorda contactar coa asociación TEAVIAL co obxectivo de asinar un convenio de colaboración para a adaptación dos pasos de peóns para persoas con TEA, mediante a aplicación dos pictogramas do proxecto TEAVIAL, desenvoltos pola propia asociación.



Carballo a 10 de outubro do 2022.  
María Carmen Vila Blanco.  
Voceiro/a Grupo Municipal Socialista.

SR/A. ALCALDE/SA-PRESIDENTE/A DA CORPORACIÓN MUNICIPAL